

Genèse, 6 (Vulgate, Latin)

¹ cumque coepissent homines multiplicari super terram et filias procreassent ² videntes filii Dei filias eorum quod essent pulchrae acceperunt uxores sibi ex omnibus quas elegerant ³ dixitque Deus non permanebit spiritus meus in homine in aeternum quia caro est eruntque dies illius centum viginti annorum ⁴ gigantes autem erant super terram in diebus illis postquam enim ingressi sunt filii Dei ad filias hominum illaeque genuerunt isti sunt potentes a saeculo viri famosi ⁵ videns autem Deus quod multa malitia hominum esset in terra et cuncta cogitatio cordis intenta esset ad malum omni tempore ⁶ paenituit eum quod hominem fecisset in terra et tactus dolore cordis intrinsecus ⁷ delebo inquit hominem quem creavi a facie terrae ab homine usque ad animantia a reptili usque ad volucres caeli paenitet enim me fecisse eos ⁸ Noe vero invenit gratiam coram Domino ⁹ hae generationes Noe Noe vir iustus atque perfectus fuit in generationibus suis cum Deo ambulavit ¹⁰ et genuit tres filios Sem Ham et Iafeth ¹¹ corrupta est autem terra coram Deo et repleta est iniquitate ¹² cumque vidisset Deus terram esse corruptam omnis quippe caro corruperat viam suam super terram ¹³ dixit ad Noe finis universae carnis venit coram me repleta est terra iniquitate a facie eorum et ego disperdam eos cum terra ¹⁴ fac tibi arcam de lignis levigatis mansiunculas in arca facies et bitumine linies intrinsecus et extrinsecus ¹⁵ et sic facies eam trecentorum cubitorum erit longitudo arcae quinquaginta cubitorum latitudo et triginta cubitorum altitudo illius ¹⁶ fenestram in arca facies et in cubito consummabis summitatem ostium autem arcae pones ex latere deorsum cenacula et tristega facies in ea ¹⁷ ecce ego adducam diluvii aquas super terram ut interficiam omnem carnem in qua spiritus vitae est subter caelum universa quae in terra sunt consumentur ¹⁸ ponamque foedus meum tecum et ingredieris arcam tu et filii tui uxor tua et uxores filiorum tuorum tecum ¹⁹ et ex cunctis animantibus universae carnis bina induces in arcam ut vivant tecum masculini sexus et feminini ²⁰ de volucris iuxta genus suum et de iumentis in genere suo et ex omni reptili terrae secundum genus suum bina de omnibus ingredientur tecum ut possint vivere ²¹ tolles igitur tecum ex omnibus escis quae mandi possunt et conportabis apud te et erunt tam tibi quam illis in cibum ²² fecit ergo Noe omnia quae praeceperat illi Deus

Genèse, 7 (Vulgate, Latin)

¹ dixitque Dominus ad eum ingredi tu et omnis domus tua arcam te enim vidi iustum coram me in generatione hac ² ex omnibus animantibus mundis tolle septena septena masculum et feminam de animantibus vero non mundis duo duo masculum et feminam ³ sed et de volatilibus caeli septena septena masculum et feminam ut salvetur semen super faciem universae terrae ⁴ adhuc enim et post dies septem ego pluam super terram quadraginta diebus et quadraginta noctibus et delebo omnem substantiam quam feci de superficie terrae ⁵ fecit ergo Noe omnia quae mandaverat ei Dominus ⁶ eratque sescentorum annorum quando diluvii aquae inundaverunt super terram ⁷ et ingressus est Noe et filii eius uxor eius et uxores filiorum eius cum eo in arcam propter aquas diluvii ⁸ de animantibus quoque mundis et inmundis et de volucris et ex omni quod movetur super terram ⁹ duo et duo ingressa sunt ad Noe in arcam masculus et femina sicut praeceperat Deus Noe ¹⁰ cumque transissent septem dies aquae diluvii inundaverunt super terram ¹¹ anno sescentesimo vitae Noe mense secundo septimodecimo die mensis rupti sunt omnes fontes abyssi magnae et cataractae caeli apertae sunt ¹² et facta est pluvia super terram quadraginta diebus et quadraginta noctibus ¹³ in articulo diei illius ingressus est Noe et Sem et Ham et Iafeth filii eius uxor illius et tres uxores filiorum eius cum eis in arcam ¹⁴ ipsi et omne animal secundum genus suum universaque iumenta in genus suum et omne quod movetur super terram in genere suo cunctumque volatile secundum genus suum universae aves omnesque volucres ¹⁵ ingressae sunt ad Noe in arcam bina et bina ex omni carne in qua erat spiritus vitae ¹⁶ et quae ingressa sunt masculus et femina ex omni carne introierunt sicut praeceperat ei Deus et inclusit eum Dominus de foris ¹⁷ factumque est diluvium quadraginta diebus super terram et multiplicatae sunt aquae et elevaverunt arcam in sublime a terra ¹⁸ vehementer inundaverunt et omnia repleverunt in superficie terrae porro arca ferebatur super aquas ¹⁹ et aquae praevaluerunt nimis super terram opertique sunt omnes montes excelsi sub universo caelo ²⁰ quindecim cubitis altior fuit aqua super montes quos operuerat ²¹ consumptaque est omnis caro quae movebatur super terram volucrum animantium bestiarum omniumque reptilium quae reptant super terram universi homines ²² et cuncta in quibus spiraculum vitae est in terra mortua sunt ²³ et delevit omnem substantiam quae erat super terram ab homine usque ad pecus tam reptile quam volucres caeli et deleta sunt de terra remansit autem solus Noe et qui cum eo erant in arca ²⁴ obtinueruntque aquae terras centum quinquaginta diebus

Genèse, 8 (Vulgate, Latin)

¹ recordatus autem Deus Noe cunctarumque animantium et omnium iumentorum quae erant cum eo in arca adduxit spiritum super terram et inminutae sunt aquae ² et clausi sunt fontes abyssi et cataractae caeli et prohibitae sunt pluviae de caelo ³ reversaeque aquae de terra euntes et redeuntes et coeperunt minui post centum quinquaginta dies ⁴ requievitque arca mense septimo vicesima septima die mensis super montes Armeniae ⁵ at vero aquae ibant et decrescebant usque ad decimum mensem decimo enim mense prima die mensis apparuerunt cacumina montium ⁶ cumque transissent quadraginta dies aperiens Noe fenestram arcae quam fecerat dimisit corvum ⁷ qui egrediebatur et revertebatur donec sicarentur aquae super terram ⁸ emisit quoque columbam post eum ut videret si iam cessassent aquae super faciem terrae ⁹ quae cum non invenisset ubi requiesceret pes eius reversa est ad eum in arcam aquae enim erant super universam terram extenditque manum et adprehensam intulit in arcam ¹⁰ expectatis autem ultra septem diebus aliis rursum dimisit columbam ex arca ¹¹ at illa venit ad eum ad vesperam portans ramum olivae virentibus foliis in ore suo intellexit ergo Noe quod cessassent aquae super terram ¹² expectavitque nihilominus septem alios dies et emisit columbam quae non est reversa ultra ad eum ¹³ igitur sescentesimo primo anno primo mense prima die mensis inminutae sunt aquae super terram et aperiens Noe tectum arcae aspexit viditque quod exsiccata esset superficies terrae ¹⁴ mense secundo septima et vicesima die mensis arefacta est terra ¹⁵ locutus est autem Deus ad Noe dicens ¹⁶ egredere de arca tu et uxor tua filii tui et uxores filiorum tuorum tecum ¹⁷ cuncta animantia quae sunt apud te ex omni carne tam in volatilibus quam in bestiis et in universis reptilibus quae reptant super terram educ tecum et ingredimini super terram crescite et multiplicamini super eam ¹⁸ egressus est ergo Noe et filii eius uxor illius et uxores filiorum eius cum eo ¹⁹ sed et omnia animantia iumenta et reptilia quae repunt super terram secundum genus suum arcam egressa sunt ²⁰ aedificavit autem Noe altare Domino et tollens de cunctis pecoribus et volucribus mundis obtulit holocausta super altare ²¹ odoratusque est Dominus odorem suavitatis et ait ad eum nequaquam ultra maledicam terrae propter homines sensus enim et cogitatio humani cordis in malum prona sunt ab adolescentia sua non igitur ultra percutiam omnem animantem sicut feci ²² cunctis diebus terrae sementis et messis frigus et aestus aestas et hiemps nox et dies non requiescent

Genèse, 9 (Vulgate, Latin)

¹ benedixitque Deus Noe et filiis eius et dixit ad eos crescite et multiplicamini et implete terram ² et terror vester ac tremor sit super cuncta animalia terrae et super omnes volucres caeli cum universis quae moventur in terra omnes pisces maris manui vestrae traditi sunt ³ et omne quod movetur et vivit erit vobis in cibum quasi holera virentia tradidi vobis omnia ⁴ excepto quod carnem cum sanguine non comedetis ⁵ sanguinem enim animarum vestrarum requiram de manu cunctarum bestiarum et de manu hominis de manu viri et fratris eius requiram animam hominis ⁶ quicumque effuderit humanum sanguinem fundetur sanguis illius ad imaginem quippe Dei factus est homo ⁷ vos autem crescite et multiplicamini et ingredimini super terram et implete eam ⁸ haec quoque dixit Deus ad Noe et ad filios eius cum eo ⁹ ecce ego statuam pactum meum vobiscum et cum semine vestro post vos ¹⁰ et ad omnem animam viventem quae est vobiscum tam in volucris quam in iumentis et pecudibus terrae cunctis quae egressa sunt de arca et universis bestiis terrae ¹¹ statuam pactum meum vobiscum et nequaquam ultra interficietur omnis caro aquis diluvii neque erit deinceps diluvium dissipans terram ¹² dixitque Deus hoc signum foederis quod do inter me et vos et ad omnem animam viventem quae est vobiscum in generationes sempiternas ¹³ arcum meum ponam in nubibus et erit signum foederis inter me et inter terram ¹⁴ cumque obduxero nubibus caelum apparebit arcus meus in nubibus ¹⁵ et recordabor foederis mei vobiscum et cum omni anima vivente quae carnem vegetat et non erunt ultra aquae diluvii ad delendam universam carnem ¹⁶ eritque arcus in nubibus et videbo illum et recordabor foederis sempiterni quod pactum est inter Deum et inter omnem animam viventem universae carnis quae est super terram ¹⁷ dixitque Deus Noe hoc erit signum foederis quod constitui inter me et inter omnem carnem super terram ¹⁸ erant igitur filii Noe qui egressi sunt de arca Sem Ham et Iafeth porro Ham ipse est pater Chanaan ¹⁹ tres isti sunt filii Noe et ab his disseminatum est omne hominum genus super universam terram ²⁰ coepitque Noe vir agricola exercere terram et plantavit vineam ²¹ bibensque vinum inebriatus est et nudatus in tabernaculo suo ²² quod cum vidisset Ham pater Chanaan verenda scilicet patris sui esse nuda nuntiavit duobus fratribus suis foras ²³ at vero Sem et Iafeth pallium inposuerunt umeris suis et incedentes retrorsum operuerunt verecunda patris sui faciesque eorum aversae erant et patris virilia non viderunt ²⁴ evigilans autem Noe ex vino cum didicisset quae fecerat ei filius suus minor ²⁵ ait maledictus Chanaan servus servorum erit fratribus suis ²⁶ dixitque

benedictus Dominus Deus Sem sit Chanaan servus eius ²⁷ dilatet Deus Iafeth et habitet in
tabernaculis Sem sitque Chanaan servus eius ²⁸ vixit autem Noe post diluvium trecentis
quingenta annis ²⁹ et impleti sunt omnes dies eius nongentorum quingenta annorum et
mortuus est